


後唐
明宗

竹居
致慶

全唐文
卷一百八之二十

鍾明堂

竹居叢書



全唐文
卷一百一十五

欽定全唐文卷一百八目錄

後唐明宗

三

賜吳越王錢鏐謚詔

答孟知祥奏請發遣兵士家口來川詔


許孟知祥權行墨制詔

許孟知祥奏趙季良等五人乞正授節旄詔

冊命高麗國王詔

又詔

又詔



賜高麗三軍將吏詔

答馮道等表請徽號加廣道法天四字詔

却貢鷹犬勅

京城許蓋屋宇勅

令閤門使宣放朝班勅

御名二字不連稱不得迴避勅

依李琪朝望奏對勅

置彰國軍勅

嚴誠攝官勅

諭三京諸州府勅

祈晴勅

落劉瑩等進士勅

祈雪勅

契丹國主阿保機薨逝輟朝勅

赦宥繫囚勅

約勒諸城放出錢勅

答蕭希甫奏釋天成以前罪人勅

禁造佛寺、剃度勅

禁淹停埋葬勅

禁鐵鑼錢勅

久任刺史勅

禁賣藥四條

禁私開立河泊所勅

禁私開立河泊所勅

禁私開立河泊所勅

禁私開立河泊所勅

禁私開立河泊所勅

欽定全唐文卷一百八

後唐明宗

三

賜吳越王錢鏐謚詔

天下兵馬大元帥尚書令吳越國王錢鏐本朝元老當代
勲賢位已極於人臣名素高於簡冊贈典旣無其官爵易
名宜示其優崇即令所司定謚曰武肅仍以王禮葬

答孟知祥奏請發遣兵士家口來川詔

供奉官陳延矩回覽所奏遂閬黔夔等州自此差來所屯
軍都將士等當府已厚給衣糧盡令優足其指揮都頭各

隨職次悉以安排雖因事以在川固係籍而爲國但念各有家口骨肉在本管軍營居此者已有生涯在彼者寧無離戀伏乞勅見在營幕放前件將士家口入川等事具悉切自釁起梓綿災延巴蜀繇茲姦賊累我藎臣阻渥澤以不通搆猜嫌而莫解果招神感自就天誅卿有勇有謀克忠克孝雖偶遭誑誤而每切推崇率師徒而繼殄隣凶貢表章而尋輸臣節兼以諸方戍卒皆厚給於衣糧數道王人亦優加於供待周勤若是嘉歎良深并奏人名已係兵籍朕旣推誠而待物卿方盡瘁以事君卿安即是朕安在

彼何殊在此所謂家眷東地更乞發遣西行旣覽奏陳固
議俞允尋命宣茲表意採彼輿言皆以久抱睽離極思團
聚但以捨茲九族就彼一身雖絲蘿琴瑟之情分飛甚苦
而松柏邱園之戀拋棄尤難又知已有生涯恐虞却相棄
擲況聞兩川曾經戰鬪必有殺傷旣難輕議於往來兼恐
不實其存沒切恐去不相見住無所依轉令兩地之困空
盡致一家之沈沒聞茲哀訴又可憫懷其如口數頗多地
里極遠如或正身自來般取即應此輩不貯憂疑卿可體
彼人情詳茲物理妙加籌度貴叶便宜故茲詔示想宜知

悉

許孟知祥權行墨制詔

據所奏以文武之將寮希尺寸之官賞請卿自稱王爵權
行制書卿以未經先奏於宸聰不欲便加於衆意却緣熊
羆之武旅懷鐵石之壯心或立功勞須加爵賞難以具排
官氏繁奏聖聰敢希顯降明文許行墨制亦自朝廷之成
命委藩翰以奉宣凡有施行後當聞奏免憂迢遞庶從便
宜等事具悉卿等最親最舊不溢不驕爰自中興夙參佐
命厭大權而不處守高節以自全成茲令名標於信史洎

總茲千乘鎮彼一隅不將富貴爲心惟以邦家是念盡血
誠而推戴竭土產以貢輸每念忠良正深繫賴忽被董璋
之逼迫遽令蜀郡以攜離卿雖外合元凶而內全大節文
翰每深於恭敬使臣盡厚於接延兼聞曾興議於東川欲
拜章於北闕彼旣他說此難獨行察卿此際之誠契朕從
初之料今則詔書纔降章表繼來阻推勸之衆情高辭王
爵執變通之獨見遠貢臣誠去假號而就真封抑異端而
全大計非卿不能斷此意非朕不能悉此心載閱敷陳備
詳披瀝自然可久可大傳子傳孫長爲一面之藩維永作

四方之表式其文武將寮等或武有折衝之術文多經濟之材咸能贊佐元戎削平大憝功勲顯著酬獎必行所請權行制書貴從宜便雖隨方設教叶遠藩衆庶之情而引古證今異本朝全盛之事切念道途久絕人使纔通在朕方務於綏懷於卿固無於愛惜緬思盡節必認注心自今已後劔南諸道應節度使刺史并州縣官軍府文武將吏等或陞降賢愚或黜陟功過一切委卿逐便選擇差署施行訖奏朝廷更不除人豈惟叶彼權宜抑亦表吾委任故茲詔示想宜知悉

許孟知祥奏趙季良等五人乞正授節旄詔

據所奏節度副使知武泰軍節度兵馬留後趙季良馬步
諸軍都指揮使知武信軍節度兵馬留後李仁罕左廂馬
步都指揮使知保寧軍節度兵馬留後趙廷隱右廂馬步
都指揮使知寧江軍節度兵馬留後張知鄴衙內馬步都
指揮使知昭武軍節度兵馬留後李肇等臣各以簡署列
藩委之共理伏乞特頒詔令各降真恩儻蒙委以節旄則
望付臣宣賜仍希眷澤各轉官階等事具悉卿前鎮彼遠
方迫於近患欲作婉成之計須爲苟合之容果中含宏自

貽誅戮趙季良等體卿忠孝感卿撫綏或獻謀於帷幄之
間或效勇於鼓旗之下賴茲奮發致彼廓清今則纔翦凶
徒尋輸忠節雖知祥之通變亦季良之贊成況彼皆是重
藩並難虛位言念數子參佐一心不惟功合獎酬兼亦材
堪任使但能致理何爽從權所委留司悉諧朕意應希渥
澤並可允俞但緣卿自建大功未加殊寵即俟相次便與
施行其旌節官告等更不差使頒宣亦便委卿分付所乞
墨制已從別詔處分故茲詔示想宜知悉

冊命高麗國王詔

王者法天而育兆庶體地而安八紘允執大中式彰無外
斗極正而衆星咸拱溟渤廣而百谷皆宗所以居戴履之
倫窮照臨之境宏道修德恭己虛懷歸心者睠爲王人嚮
化者被以風教由是舉封崇之命稽旌賞之文垂於古先
罔敢失墜其有地稱平壤師擅兼材統五旅之強宗控三
韓之奧壤務權鎮靜志奉聲明爰協彝章是加寵教咨爾
權知高麗國王事建身資雄勇智達機鈴冠邊城以挺生
負壯圖而間出山河有授基址克豐踵朱蒙啟土之禎爲
彼君長履箕子作藩之跡宣乃惠和俗厚知書故能道之

以禮義風驍尚武故能肅之以威嚴提封於是謐寧生聚
以之完輯而復行及唇齒分篤皮毛忿黠虜之挺袂恤隣
邦而救患矧以披肝效順秉節納忠慕仁壽以康時識文
思之撫運海航深險輸睠貢琛繼陳述職之儀茂著勤王
之業夫推至誠而享豐報道之常也奠真封而顯列國禮
之大也勞有所至朕無愛焉今遣使太僕卿王瓊使副太
府少卿兼通事舍人楊昭業等持節備禮冊命爾爲高麗
國王於戲作善天降之祥守正神祚之福干戈慎於危事
文軌資於遠謀永爲唐臣世報王爵往踐厥位汝惟欽哉

又詔

卿珠樹分輝金鉤協兆領日邊之分野冠海外之英雄士
心同感於撫循民意咸歌於惠養而又誠堅事大志在恤
隣秣馬利兵挫甄萱之黨分衣減食濟忽汗之人繼航海
以拜章每充庭而致貢金石之誠明貫日風雲之梗概凌
空名播一時美流四裔志規若此賞典寧忘特議䟽封仍
升峻秩翦桐圭而錫命目極蓬山睠桃野以傾思心隨濟
水勉祇異禮永保崇勛今授卿特進檢校太尉使持節元
菟州都督上柱國充大義軍使仍封高麗國王今差使太